



KENYATAAN / SIARAN AKHBAR

Untuk maklumat lanjut sila hubungi:
Bahagian Komunikasi Korporat
Perbadanan Putrajaya
Tel: 03-88877033 Faks: 03-88811008

PPj, TNB METERAI MoU JAYAKAN VISI PUTRAJAYA BANDAR PINTAR DAN BANDAR RENDAH KARBON

PUTRAJAYA, 4 Jun 2024 – Majlis Menandatangani Memorandum Persefahaman (MoU) dan Perjanjian Supply Agreement of Renewable Energy (SARE) di antara Perbadanan Putrajaya (PPj) dan Tenaga Nasional Berhad (TNB) telah berlangsung pada hari ini bertempat di Hotel Pulse Grande disaksikan oleh Dr. Zaliha Mustafa, Menteri di Jabatan Perdana Menteri (Wilayah Persekutuan). MoU tersebut telah ditandatangani oleh Datuk TPr. Fadlun Mak Ujud, Presiden PPj dan Datuk Ir. Megat Jalaluddin Megat Hassan, Presiden/Ketua Pegawai Eksekutif TNB.

Kerjasama ini memfokuskan kepada pembangunan tenaga elektrik, tenaga boleh baharu dan perkara-perkara berkaitan dengannya bagi pembangunan Bandar Pintar dan Bandar Rendah Karbon di Putrajaya.

Menurut Dr. Zaliha Mustafa, “PPj sedang melaksanakan pembangunan Bandar Pintar berlandaskan Pelan Tindakan Bandar Pintar Putrajaya (2018-2025) dengan visi meningkatkan suasana kehidupan dan pembangunan mampan pintar ke arah kehidupan yang berkualiti tinggi. Bagi memenuhi hasrat ini, beberapa inisiatif telah digariskan dalam Pelan Tindakan Bandar Pintar Putrajaya (2018-2025) di bawah domain Persekitaran Pintar yang memberi fokus kepada pemantauan data-data penggunaan tenaga dan pengurangan pelepasan karbon”.

“Selain itu, PPj turut merangka *Roadmap* Putrajaya Bandar Rendah Karbon yang menetapkan beberapa sasaran menjelang tahun 2030 untuk mengurangkan pelepasan karbon melalui peningkatan kegunaan tenaga boleh baharu. Antaranya adalah 100% Indeks Tenaga Bangunan di bawah 150 kWh untuk setiap meter persegi setahun, 15,000 MWh penjanaan tenaga solar setiap tahun, 33% pengurangan dalam pelepasan GHG mutlak dan 100% lampu jalan menggunakan LED” menurutnya lagi.

Kerjasama di antara PPj dan TNB merangkumi pembangunan, penyelenggaraan, penyelidikan dan latihan berkaitan tenaga boleh baharu termasuk pembangunan solar bumbung, kenderaan elektrik dan infrastruktur yang berkaitan dengannya, tenaga berkaitan infrastruktur awam serta menjadikan Putrajaya sebagai lokasi makmal hidup (*Putrajaya as the Living Lab*) untuk teknologi berkaitan tenaga. Selain itu, PPj dan TNB turut akan bekerjasama di dalam perkongsian, analisa, perancangan dan auditan data berkaitan dengan penggunaan tenaga dan tenaga boleh baharu.

Kerjasama ini bukan sahaja mengoptimumkan impak Roadmap Putrajaya Bandar Rendah Karbon, tetapi juga untuk mengembangkan inovasi serta penglibatan dari pihak industri yang terlibat dalam pembangunan tenaga boleh baharu. Warga Putrajaya juga akan mendapat manfaat dari segi penjimatan bil elektrik melalui pakej pembangunan tenaga solar melibatkan premis perumahan persendirian.

Buat permulaan, TNB melalui anak syarikatnya, GSPARX akan memasang sistem solar berkapasiti 363kWp di Kompleks Perbadanan Putrajaya melalui Perjanjian Bekalan Tenaga Boleh Baharu (SARE). TNB berhasrat untuk bekerjasama dengan Kerajaan termasuk Kementerian yang berkaitan bagi pemasangan solar di bangunan-bangunan Kerajaan di kawasan Putrajaya. Di samping itu, TNB juga boleh menawarkan program-program berkaitan kecekapan tenaga bagi membantu kesemua Kementerian dan Jabatan di Putrajaya ke arah penggunaan tenaga yang lebih cekap di bangunan-bangunan mereka.

Menurut Kamal Arifin A. Rahman, Ketua Pegawai Retail TNB, "TNB teruja untuk berganding bahu dengan Perbadanan Putrajaya dalam merealisasikan visi mencipta 'Bandar Pintar dan Bandar Rendah Karbon' di Putrajaya. Kami komited untuk menawarkan penyelesaian inovatif ini yang sejajar dengan pelan mengurangkan pelepasan karbon dalam aspirasi kami untuk menjadi pembekal terunggul solusi tenaga mampan di Malaysia dan antarabangsa. Ia seiring sokongan terhadap inisiatif Kerajaan dalam melaksanakan Pelan Hala Tuju Peralihan Tenaga Negara (NETR), bagi menjana tenaga lebih bersih dalam usaha mengukuhkan komitmen terhadap Alam Sekitar, Sosial dan Tadbir Urus (ESG)".

Di samping itu, GSPARX turut menawarkan tawaran promosi khas solar untuk kediaman (residential solar) kepada warga Putrajaya yang ingin menggunakan tenaga hijau di samping menikmati penjimatan bil elektrik.

Promosi akan berlangsung selama dua bulan, bermula 1 Jun 2024 sehingga 31 Julai 2024, tertakluk kepada 200 orang terawal. Warga Putrajaya yang berminat boleh membuat permohonan melalui tiga kaedah, iaitu permohonan secara fizikal di Kedai Tenaga Putrajaya, melalui telefon di talian 0103376769 / 01136463837 atau e-mel di retail.putrajaya@tnb.com.my.

Persefahaman yang terjalin serta segala kerjasama dan usaha di bawahnya ini juga adalah selari ke arah menjayakan visi C.H.A.S.E. City (*Clean, Healthy, Advanced, Safe & Eco-friendly City*) yang digagaskan Jabatan Wilayah Persekutuan (JWP) di bawah kepimpinan Dr. Zaliha Mustafa.



b.p. Presiden Perbadanan Putrajaya

Tarikh: 4 Jun 2024

Sila hubungi Pegawai Media PPj (En. Mohamad Rohaizat bin Kasman di talian 017-3132590 atau Puan Haryani binti Kaulan di talian 019-3831564) bagi keterangan lanjut berhubung siaran media ini.

- Ends -